

Geahččalii suoládit biilla

ROMSA: Duorastat idida válde politijjat gitta muhtun dievddu 40-jagis, ja nis-sonolbmo 30-jagis, go leigga geahččaleamen beassat sisa muhtin biilli. Politijjat váruiht sudno áigon suoládit biilla ja dan dihtii biddjuiga giddagassii, dieđiha i Tromsø.

Presideantabárra Tromsii

NORGA: Majestehtalaš Gonagas Harald V lea bovden Singapura presideantta dr. Tony Tan Keng Yam ja su eamida fru Mary Tan boahit stáhtaguossái Norgii. Lea vuosttaš geardde go leaba Norggas, ja soai galgaba maid Tromssas fitnat golgotmánu 12. beaivvi. Lea vuosttaš geardde go Norgii boahit stáhtaguossi Singapura. Ulbmil guossástallamin lea nanos-

mahttit bilaterála ovttasbarggu, earenoamážit maritiimaindustriijas ja Offshoras, muhto maiddá oahpus ja dutkamis. Presideantabárra háliida maid fitnat Gonagas Haraldin UIT - Norgga árkatalaš Universitehtas. Dasa lassin galget sii maid fitnat «Helmer Hansen»- nammasaš dutkanskiippas, dieđiha i Tromsø.

Govven: NTB Scanpix: Jeremy Lee



Hálidit buoridit gulahallama BUOLVVAID GASKKAS

Seksuálalaš áššiid ja ovttaseallima birra

Amatheas lea jodus prošeakta man mihtun lea buoridit gulahallama buolvvaid gaskkas. Nuoraide galgá šaddat álkibun hupmat etniiguin, áhkuiguin ja vel máttaráhkuiguin ge váttis dilálašvuodaid birra, seksuálaáššiid ja ovttaseallima birra.

Amathea Romsa/Finnmárku lea bargamin ovttain prošeavttain man namma lea «Ung framtids-helse i nord» ja sii leat ge leamašan Guovdageainnus prošeavtta oktavuodas. Sii háliidit vuorasolbmuid mielde prošeaktii, sihke etnid, áhkuid ja máttaráhkuid.

– Boarrásit buolva lea vásihan ollu, ja livččii ge heivvolaš ahte nuorra olbmot dustet eambo hupmat vuorasolbmuiguin iežas áššiid birra, lohka prošeaktajodiheddji Trine Kvitberg.

Buoret gulahallan

Amathea Romsa/Finnmárku lea prošeavtta oktavuodas ovttasbargu Finnmarkku Fylkkamánniin, ja sii leat ge diibmá ožžon doarjaga prošeaktii Finnmarkku Fylkkamánis.

Amathea bargagodii diibmá dáinna, ja vuosttaš oassi lei fitnat Finnmarkku joatkkaskuvllain. Doppe sii čájeha filmma «Nuorra ja áhpeheapme», nuorra nieida gii ii duostan muitalit iežas eadnái ahte lea áhpeheapme. Dál áigu Amathea dáinna prošeavttain veahkehit nuorra olbmuid álkibut duostat hupmat boarrásit buolvvain váttis dilálašvuodaid birra. Sihke gulahallama dáfus, seksuálalaš áššiid, ja ovttaseallima birra.

Váttis hupmat

Amathea bagadeaddji, Trine Kvit-



PROŠEAVTTA JODIHEADDJI: Trine Kvitberg lohka sii áigot prošeavttain geahččalit buoridit gulahallama buolvvaid gaskkas.

Govven: Priváhta govva

berg, muitala ahte sii dávjá vásihit ahte nuoraid mielas leat váttis boarrásit olbmuiguin hupmat dákkár áššiid birra. Amathea mihttu ja ulbmil prošeavttain lea ahte sii áinnas háliidit ahte boarrásit nissonolbmuid jietna galgá gullot dáid fáttáid oktavuodas maid.

Oallugat servet

Trine Kvitberg lohka Guovdageainnus lei hirbmat fiinnis fitnat humadeame vuorrasit olbmuiguin, go sis lei ollu maid áiggošii muitalit nuorra olbmuide. Ledje mánggas geat válde oktavuoda Kvitbergain ja áigo searvat prošeaktii. Sii ledje almuhán ahte ohcet vuorrasit nis-

sonolbmuid Guovdageainnus prošeaktii. Dáinna lágiin sii ožžo ge muhtin olbmuid searvat dasa.

– Lea hirbmat somá go Guovdageainnus válde vuorrasit olbmot oktavuoda. Lea áin vejolašvuhta váldit oktavuoda, go mii leat fas boahtime Guovdageidnui bargat viidáseappot prošeavttain, lohka Kvitberg.

Válljen nissonolbmuid

Dán prošeavttas leat válljen dušše nissonolbmuiguin hupmat ja makkár neavvagat sis livčče nuoraide. Dat lea dan dihte go prošeakta guoská nissonolbmuid dearvašvuhtii.

Ann-Karoline Eira